

ВО ВТОРНИК 5-Я СЕДМИЦЫ ВЕЧЕРА,

**стихословим, вместо Ко Господу, кафисму 19. На Господи воззвах:
поставим стихов 6: и поем стихиры подобны трипеснца 3. И в Минее 3.**

Подобны господина Иосифа, глас 8:

Подобен: Что вы наречем:

Брашно любовь творяще, / воздержанием страсти удержим вернии, / и Богу нас ради вознесшемся на Кресте, / и копием прободшемся в ребра, / пожити благоугодно ведемся, / да пищи насладимся вечныя и лучшия, / славяще Спаса душ наших.

Подобен:

Древом древле смерть обретохом, / ныне же паки жизнь Древом крестным: / страстей убо стремления умертвим вернии, / и достигнути спасительное Воскресение всех Благодетеля молим, / деяньми божественными сияюще, / и добродетельми украшаеми, / славяще Спаса душ наших.

Ина стихира подобна, господина Феодора, глас 2.

Подобен: Паче ума благих:

Живоносный Твой Крест похваляем Господи, / и нас ради священная плоти Твоя страдания: / копие же, заколения, посмеяния, оплевания, / биения и заушения с багряницею, / и венец терноплетенный, имиже от клятвы вся избавив спасл еси ны. / Темже молим Тя, / постов время мирно скончати подаждь нам.

Прокимен, псалом 89, глас 4: Господи, прибежище был еси нам в род и род.

Стих: Прежде даже горам не быти, и создатися земли, и вселенней:

Бытия чтение. [Глава 15, ст. 1 – 15.]

Бысть слово Господне ко Авраму в видении нощию, глаголя: не бойся Авраме: аз защищаю тя, мзда твоя многа будет зело. Глагола же Аврам: Владыко Господи, что ми даси? аз же отпускаюся безчаден: сын же масек домочадицы моя, сей Дамаск Елиезер. И рече Аврам: понеже мне не дал еси семене, домочадец же мой наследник мой будет. И абие глас Господень бысть к нему, глаголющий: не будет сей наследник твой, но иже изыдет из тебе, той будет наследник тебе. Изведе же его вон, и рече ему: воззри на небо, и изочти звезды, аще возможеши исчести я. и рече: тако будет семя твое. И верова Аврам Богу, и вменися ему в правду. Рече же к нему: аз [есмь] Бог изведый тя от страны Халдейския, яко дати тебе землю сию наследствовати. И рече: Владыко Господи, по чесому уразумею, яко наследити ю имам? Рече же к нему: возми Мне юницу трилетну, и козу трилетну, и овна трилетна, и горлицу, и голубя. Взя же он вся сия, и раздели я на полы, и положи я противолычна едина к другому, птиц же не раздели. Слетеша же птицы на телеса растесаная

их: и седе близу их Аврам. Заходящу же солнцу, ужас нападе на Аврама, и се страх темен велий нападе нань. И речено бысть ко Авраму: ведый увеси, яко пресельно будет семя твое в земли не своей, и поработят я, и озлобят я, и смирят я лет четыреста. Языку же, емуже поработают, сужду Аз: по сих же изыдут семо со имением многим. Ты же отыдеши ко отцем твоим в мире, препитан в старости добрей.

Прокимен, псалом 90, глас 4: Живый в помощи Вышняго, в крове Бога Небеснаго водворится.

Стих: Речет Господеви: Заступник мой еси.

Притчей чтение. [Глава 15, ст. 7 – 19.]

Устне мудрых связуются чувством: сердца же безумных не тверда. Жертвы нечестивых мерзость Господеви: обеты же правоходящих приятны Ему. Мерзость Господеви путие нечестивых: гонящая же правду любит. Наказание незлобиваго познавается от мимоходящих: ненавидящие же обличения скончаваются срамно. Ад, и пагуба явна пред Господем: како не и сердца человеков? Не возлюбит ненаказанный обличающих его, с мудрыми же не побеседует. Сердцу веселящуся, лице цветет: в печалех же сушу, сетует. Сердце право ищет чувства: уста же ненаказанных уразумеют злая. На всяко время очи злых приемлют злая: добрии же безмолвствуют присно. Лучше частица малая со страхом Господним, нежели сокровища велия без боязни. Лучше учреждение от зелий с любовию и благодатию, нежели представление тельцев со враждою. Муж ярый устрояет брани: долготерпеливый же и будущую укрощает. терпеливый муж угасит суды: нечестивый же воздвизает паче. Путие праздных постлани тернием: мужественных же углаждени.

На стиховне самогласны, глас 5, единожды:

Поползнувся от праваго пути Твоего, / от страстей окаянный низпадохся в ров, / левит же со священником видевшие мя, / претекоша. Ты же Христе помиловал еси мя, / и оружием Креста греховное рукописание растерзав, / безстрастием уяснил еси, / и Отцу соседателя сотворил еси. / Темже зову Тебе: / непостижимо Господи слава Тебе.

Ина стихира, глас 8, единожды:

Из Иерусалима снисдох поползнувся, / от написанных в нем языком заповедей Твоих: / во Иерихон же идый подражательным стремлением, / в нем древле ради злобы от Тебе, / ко убийству издавшихся людем Твоим преслушанием, / душетленным прилучихся страстем, / якоже разбойником. От них уязвена исполу умерщвлена, / гвоздьми и копием плотию уязвивыйся волею, / греха ради человека, / и общее совершивый Крестом спасение / во Иерусалиме, / исцели мя Господи, и спаси мя.

Стих: К Тебе возведох очи мои, живущему на небеси. Се яко очи раб в руку господий своих, яко очи рабыни в руку госпожи своея: * тако очи наши ко Господу Богу нашему, дондеже ущедрит ны.

Из Иерусалима снидох поползнувся, / от написанных в нем языком заповедей Твоих: / во Иерихон же идый подражательным стремлением, / в нем древле ради злобы от Тебе, / ко убийству издавшихся людем Твоим преслушанием, / душетленным прилучихся страстем, / якоже разбойником. От них уязвена исполу умерщвлена, / гвоздьми и копием плотию уязвивыйся волею, / греха ради чловеча, / и общее совершивый Крестом спасение / во Иерусалиме, / исцели мя Господи, и спаси мя.

Стих 2: Помилуй нас Господи, помилуй нас, яко по многу исполнихомся уничижения: наипаче наполнися душа наша поношения гобзующих, * и уничижения гордых.

Мученичен: Мученицы Твои Господи, / забывше суцая в житии, / нерадивше и о муках будущия ради жизни, / и сея наследницы явишася: / темже и со ангелы радуются, / тех молитвами даруй людем Твоим / велию милость.

Слава, и ныне, Крестобогородичен:

Господи, егда Тя солнце виде на Древе висима Солнца правды, / лучи сокры, / и луна свет во тьму преложи: / Всенепорочная же Мати Твоя утробою уязвляшеся.

В СРЕДУ 5-Я СЕДМИЦЫ, НА УТРЕНИ ТРОИЧНЫ:

Таже кафисмы 20, 1, 2.

По 1-м стихословии седалны Крестныя Осмогласника два, с Крестобогородичным.

По 2-м же стихословии, настоящий седален, господина Иосифа, глас 8.

Подобен: Повеленное тайно:

Древа вкусив Адам не в лепоту, / невоздержания горце плоды объят: / вознес же Ся на Древо, сего избавил еси Щедре / осуждения лютаго. / Темже Ти вопием: / даждь нам воздержатися Владыко, / от плода тлетворнаго, / и твориши волю Твою, / яко да обрящем милость. **[Дважды.]**

Крестобогородичен: От кровей Твоих чистых воплощенна, / и паче смысла от Тебе Чистая рожденна, / на Древе висима посреде злодею видящи, / утробами болезновала еси, / и матерски рыдающи вопияла еси: / увы Мне Чадо Мое! кое Божественное / и неизреченное смотрение Твое, / имже оживил еси создание Твое? / Воспеваю благоутробие Твое.

По 3-м стихословии седален, господина Феодора, глас 2.

Подобен: Пречистому Твоему образу:

Древо всесвятое, крестное воспевающе, / крайней благости Твоей покланяемся присно Христе Боже: / на сем бо упразднил еси силы вражия, / и дал еси знамение верующим в Тя: / темже благодарно вопием Ти: / всех сподоби благодушно мирно живущих, / исполнити постное время. **[Дважды.]**

Крестобогородичен: Непорочнаго Пастыря Тя зрящи Агнца на Древо воздвижена, / рыдающи матерски вопияше: / Сыне, на смерть Тя осудиша неблагодарнии людие, / за еже облак простерл еси в прехождение их: / увы Мне, безчадствуяся безмужная! / но востани, и возсияй Солнце, / и прославлюся в сынех земнородных.

Канон Минеи, и настоящий трипеснец господина Иосифа. И стихословится песнь, глас 8.

Песнь 3.

Ирмос: Небеснаго круга:

Осудив вражду, на Кресте простерл еси Твои правосуде длани: ныне же осужденна мя суща прегрешеньми, спаси блуднаго Спасе, огорчившаго Тя долготерпеливаго.

Скотское возжелех страсотворное житие, Твоих заповедей удалихся Спасе Преплагий, странными порабощен и нечистыми гражданы, ныне же обращающася приими, и спаси мя.

Гугниваго якоже древле слуха отверзл еси, отверзи души моя ушеса нравом оглушенна, и внушити Твое спасительное слово, Иисусе сподоби мя едине Человеколюбче.

Богородичен: Спасительная врата, к Богу мосте, христиан предстательнице, Пречистая Владычице, обстоима мя напастьми жития и обуреваема, Отроковице окорми.

Иный господина Феодора. Глас 2.

Ирмос: Неподродствовавший мой ум, / плодоносен Боже покажи ми, / делателю добрых, / насадителю благих, / благоутробием Твоим.

За милосердие щедрот возшед на Крест, извлекл еси мя из рова страстей, и вознесл еси Христе, в небесная.

Простер на Кресте длани Твои Христе языки вся удаленныя от Тебе объял еси, близ стати державы Твоея.

Троицен: Триипостасная Единице, пресущная Троице, Божество едино, Отче и Сыне, и Душе правый, спаси чтущия Тя.

Богородичен: Кто хвалити Тя от земных, по достоянию возможет Мати Дево? Ты бо в женах едина явилася еси избранная, и всеблаженная.

Слава Тебе Боже наш, слава Тебе.

Вознеслся еси на Кресте, прободен был еси в ребра, желчи вкусил еси мене ради, Иисусе, от преступления огорчившаго Тя.

Ирмос: Неподродствовавший мой ум, / плодоносен Боже покажи ми, / делателю добрых, / насадителю благих, / благоутробием Твоим.

Песнь 8.

Ирмос: Седмерицею пещь халдейский мучитель / богочестивым неистовно разжже, / силою же лучшею спасены сия виде, / Творцу и Избавителю вопияше: / отроцы благословите, / священницы воспойте, / людие превозносите во вся веки.

Неусыпным оком воззрев на мя, ущедрю, уныния дреманием одержима, и сну работающа, сладным на одре страдем, на Кресте главу Твою преклонивый, и волею уснувший, и тьму разоривый, Христе, греха, свет сый правды.

Богатотворными дарованиями украсився от крещения, паче нищету злых возлюбих, и чуждъ бых добродетелей окаянный аз, в страну далече отшед злобы. Темже обратив приими мя Спасе, Твоим Крестом ограждая во вся веки.

Пиянство страстей отрини, и слез възыщи, очистительное пощением душе, вино сердце веселящее, и сласти увядающее, и плотския пещи испепеляющее: и потщися, пригвоздившемуся тебе ради на Древе Христу сраспяться, и жити во веки.

Богородичен: Богородительнице Всечистая, души моя язвы, и греховная гноения очисти, источники омывающи от ребр Рождества Твоего, и от них очищающи струями: к Тебе бо взываю, и к Тебе прибегаю, и Тя призываю Благодатную.

Иный.

Ирмос: Гласы ангельскими / на небесех славимаго Бога, / восхвалим глаголюще, / земнороднии, во вся веки.

Распеншагося плотски, и Божеством не пострадавша Иисуса, поют ангели, и мы земнороднии во вся веки.

В распятии Твоем Христе, поносную смерть прием проклятую, спасл ны еси от тли избавивый.

Благословим Отца, и Сына, и Святаго Духа, Господа.

Херувимски Тя о Троице Свят, Свят Свят, пою едино Божество, безначальное, простое и всеми непостижное.

Богородичен: Похвалами Тя Чистая, светло почитают вси роди: Зиждителя бо родила еси. О чудо страшное, и дело всеблаженное!

Слава Тебе Боже наш, слава Тебе.

Вся претерпел еси пострадади о едином, еже спастися мне Христе: пою Твое распятие, гвоздия, и заколение во вся веки.

Хвалим, благословим, покланяемся Господеви:

Ирмос: Гласы ангельскими / на небесех славимаго Бога, / восхвалим глаголюще, / земнороднии, во вся веки.

Песнь 9.

Ирмос: Ужасеся о сем небо, / и земли удивишася концы, / яко Бог явися человеком плотски, / и чрево Твое бысть пространнейшее небесе. / Тем Тя Богородицу, / ангелов и человек чиноначалия величают.

Зря Тя простерта на Кресте, зари сокрываше солнце, вся же земля трепетом колебашеся Всецарю, волею видящи страждуща, естеством Тя безстрастна. Темже Тя молю, страсти души моя, яко врач Христе исцели.

Пути спасительныя оставив, во ад ведущия шествовах, тьму глубокую имея окрест сласти, и страстей поползновения, и бурю искушений. темже Тя молю: Твоим Крестом спаси мя Христе, яко един многомилостив.

Зимою содержимь искушений, и страстей треволнении потопляемь, и сластей бурею обуреваемь люте, пощения пучину достигох кроткую и тихую, в нейже мя окормив Твоим Крестом Щедре, ко спасению устреми.

Богородичен: Зачала еси Дево без семене, всяческая соделавшаго Слова Божия, без хотений плотских: без истления же родила еси, без болезней матерских: темже Тя Богородицу и языком и сердцем исповедающе, величаем.

Иный.

Ирмос: Девство Твое Богородице Нескверная, / еже не опали огонь Божественный, / величаем.

Волею претерпел еси распятия Спасе наш, да подаси всем жизнь, от смерти избавляя.

Древом умертвихся, и крестным Древом ожих: на немже Христос мой пригвоздився, врага моего умертви.

Троичен: Яко сущу Сыну с Родителем, и Духу Святому ссущу, единомудренно поклонимся.

Богородичен: Чудо преславное, и ужасное слышание, како и яко Мати раждаеши Чистая, и не познала еси яко Дева тления?

Слава Тебе Боже наш, слава Тебе.

Пою копие Твое, воспеваю и гвозди Твоя, губу, трость, Крест, имиже спасл мя еси Иисусе Боже.

Ирмос: Девство Твое Богородице Нескверная, / еже не опали огонь Божественный, / величаем.

Светилен гласа.

На стиховне самогласен, глас 3:

Высоту добродетелей оставивши душе моя, / во глубину греховную снизшла еси: / в лукавныя разбойники впадши: / струпов же смердящих полна сущи, / лежиши повержена недоуменна. / Темже возопий Христу Богу, / за тя распеншемуся, / и раны волею приемшему, / попецйся о мне Господи, и спаси мя.

Иный. Глас 8:

Разбойническими помышленьми уязвився окаянный, / и еле жив бых Господи, / пророческий же лик презре еле жива видеv суща, / и хитростьми человеческими неисцельна. / Темже люте боля, / во смирении сердца зову Ти Христе Боже: / излей яко благоутробен на мя великую Твою милость.

Стих: Исполнихомся заутра милости Твоя Господи, и возрадовахомся, и возвеселихомся: во вся дни наша возвеселихомся, за дни в няже смирил ны еси, лета в няже видехом злая. И призри на рабы Твоя, и на дела Твоя, и настави сыны их.

Разбойническими помышленьми уязвився окаянный, / и еле жив бых Господи, / пророческий же лик презре еле жива видеv суща, / и хитростьми человеческими неисцельна. / Темже люте боля, / во смирении сердца зову Ти Христе Боже: / излей яко благоутробен на мя великую Твою милость.

Таже стих: И буди светлость Господа Бога нашего на нас, и дела рук наших исправи на нас, и дело рук наших исправи.:

Мученичен: Мученицы Христовы непобедимии, / победивше прелесть силою Крестною, / восприяте благодать вечныя жизни, / мучителей прещения не убоястесь, / муками ураняеми веселитесь. / И ныне крови ваша быша исцеления душ наших, / молитесь спастися душам нашим.

Слава, и ныне, Крестобогородичен:

Всечистая, яко виде Тя / плотию висима на Древе, / сердцем уязвляшеся, и восклицаше слезящи, Слово: / где зашел еси вселюбезнейший Иисусе Мой, / Сыне Мой, и Господи? / Не остави Мя едину Христе рождшую Тя.

На 1-м часе кафисма 3-я, на 3-м часе 4-я, на 6-м часе 5-я.

НА 6-М ЧАСЕ ТРОПАРЬ ПРОРОЧЕСТВА, ГЛАС 1:

Болезньми святых, / иже о Тебе пострадаша, / умолен буди Господи, / и вся наша болезни / исцели Человеколюбче, молимся.

Прокимен, псалом 91, глас 4. Благо есть исповедатися Господеви, и пети имени Твоему Вышний.

Стих: Возвещати заутра милость Твою, и истину Твою на всяку ночь.

Пророчества Исаиина чтение. [Глава 41, ст. 4 – 14.]

Тако глаголет Господь: Аз Бог первый, и в грядущая Аз есмь. Видеша языцы и убояшася, концы земнии приближишася, и приидоша вкупе. Судяй кийждо ближнему, и брату помощи, и речет: Превозможе муж древоделатель, и ковач бияй млатом, вкупе проковаяй: овогда убо речет, спаяние добро есть, утвердиша я гвоздьми, положат я, и не подвижутся. Ты же Израилю, рабе Мой Иакове, егоже избрах, семя Авраамле, егоже возлюбих. Егоже поях от конец земли, и от стражб ея призвах тя, и рекох ти: раб Мой еси, избрах тя, и не оставих тебе. Не бойся, с тобою бо есмь, не прельщаю: Аз бо есмь Бог твой, укрепивый тя, и помогох ти, и утвердих тя десницею Моею праведною. Се постыдятся и посрамятся вси сопротивляющиися тебе, будут бо яко не сущии, и погибнут вси соперницы твои. Взыщеша их, и не обрящеша человек, иже поругаются тебе: будут бо аки не бывшии, и не будут ратующии тебе. Яко Аз Бог твой держай десницу твою, глаголай тебе: Не бойся Иакове, малый Израилю, Аз помогох ти, глаголет Бог твой, избавляй тя Святыи Израилев.

Прокимен, псалом 92, глас 6: Господь воцарися, в лепоту облечеся.

Стих: Облечеся Господь в силу, и препоясася.

На 9-м часе кафисма 6.